

## **Որոշման հրապարակային հասանելիությունը չսահմանափակելու վերաբերյալ**

«Կոռուպցիայի կանխարգելման հանձնաժողովի մասին» օրենքի 21-րդ հոդվածի 18-րդ մասով սահմանված իրավանորմի համաձայն՝ Հանձնաժողովի **որոշումները և եզրակացությունները** դրանց ընդունման օրվան հաջորդող հինգ աշխատանքային օրվա ընթացքում տեղադրվում են Կոռուպցիայի կանխարգելման հանձնաժողովի (այսուհետ՝ Հանձնաժողով) պաշտոնական ինտերնետային կայքում, **բացառությամբ պետական կամ օրենքով պահպանվող այլ գաղտնիք պարունակողների**:

Հանձնաժողովի կողմից նախկինում կայացված որոշումներով դրանց որոշ հատվածների հասանելիությունը սահմանափակված տարբերակով հրապարակված լինելը պայմանավորված է եղել այն հանգամանքով, որ վարույթի շրջանակներում Հանձնաժողովը ձեռք էր բերել և օգտագործել էր տվյալներ, որոնք պարունակում էին օրենքով պահպանվող գաղտնիք, որոնք կարող են իրական նշանակություն ունենալ իրավասու մարմինների կողմից իրականացվող հետագա գործողությունների համար՝ հաշվի առնելով նաև նախաքննության տվյալների հրապարակման անթույլատրելիության՝ քրեադատավարական նորմերով սահմանված պահանջը:

Տվյալ պարագայում Հանձնաժողովի կողմից Ազգային ժողովի պատգամավոր Արմեն Չարչյանի նկատմամբ հարուցված անհամատեղելիության պահանջների առերևույթ խախտման վերաբերյալ վարույթի շրջանակում կայացված 2023 թվականի հունիսի 22-ի թիվ N 01/2-2023 կասեցման որոշումը չի պարունակում օրենքով պահպանվող գաղտնիք, որը կարող է էական նշանակություն ունենալ իրավասու մարմինների կողմից իրականացվող հնարավոր գործողությունների համար, ուստի սույն որոշումը ենթակա է հրապարակման ամբողջ ծավալով՝ առանց հասանելիության սահմանափակման:



## ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ՈՐՈՇՈՒՄ N 01/2-2023

### 2023 ԹՎԱԿԱՆԻ ՄԱՐՏԻ 13-ԻՆ ԱՆՀԱՄԱՏԵՂԵԼԻՈՒԹՅԱՆ ՊԱՀԱՆՋՆԵՐԻ ԱՌԵՐԵՎՈՒՅԹ ԽԱԽՏՄԱՆ ՎԵՐԱԲԵՐՅԱԼ ՀԱՐՈՒՑՎԱԾ ԹԻՎ 01/2023 ՎԱՐՈՒՅԹԸ ԿԱՍԵՑՆԵԼՈՒ ՄԱՍԻՆ

ք. Երևան

22 հունիսի, 2023 թվական

Կոռուպցիայի կանխարգելման հանձնաժողովը, կազմով՝ Մարիամ Գալստյանի (նիստը նախագահող), Արամայիս Փաշինյանի, Նարեկ Համբարձումյանի և Լիլիթ Ալեքսանյանի (այսուհետ՝ Հանձնաժողով), ուսումնասիրելով 2023 թվականի մարտի 13-ին Ազգային ժողովի պատգամավոր Արմեն Չարչյանի նկատմամբ հարուցված անհամատեղելիության պահանջների առերևույթ խախտման վերաբերյալ թիվ 01/2023 վարույթում առկա նյութերը.

### ՊԱՐԶԵՑ

1. 2023 թվականի մարտի 13-ին Հանձնաժողովը, հիմք ընդունելով «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 1-ին կետը, նույն օրենքի 27-րդ հոդվածի 1-ին մասի 3-րդ կետը և ուսումնասիրելով Հանձնաժողովի կողմից 2022 թվականի նոյեմբերի 30-ին հարուցված թիվ 08/2022 վարույթի իրականացման շրջանակներում ձեռք բերված նյութերը, կայացրել է թիվ 01/2023 որոշումը՝ անհամատեղելիության պահանջների առերևույթ խախտման վերաբերյալ վարույթ հարուցելու մասին:

2. Արմեն Գերասիմի Չարչյանը Ազգային ժողովի պատգամավորի պաշտոնը ստանձնել է 2021 թվականի օգոստոսի 2-ին:

3. Հանձնաժողովի կողմից նախորդիվ իրականացված անհամատեղելիության պահանջների առերևույթ խախտման վերաբերյալ մեկ այլ՝ թիվ 08/2022 վարույթի իրականացման շրջանակներում Պետական եկամուտների կոմիտեի 2023 թվականի հունվարի 24-ի թիվ Մ-333-2023 գրությամբ տրամադրված տեղեկատվության համաձայն՝ Արմեն Չարչյանը 2021 թվականի օգոստոսից մինչև 2022 թվականի դեկտեմբերն ընկած ժամանակահատվածում ստացել է աշխատավարձ և դրան հավասարեցված այլ վճարումներ Երևանի Մխիթար Հերացու անվան պետական բժշկական համալսարանից (Այսուհետ՝ նաև Բժշկական համալսարան): Նշվածի ուսումնասիրությամբ Հանձնաժողովի կողմից «Էկենգ» ՓԲԸ փոխգործելիության հարթակի միջոցով Պետական եկամուտների կոմիտեի առցանց հարթակից ձեռք են բերվել տվյալներ առ այն, որ Արմեն Չարչյանը 1992 թվականի մարտի 21-ից Համալսարանում զբաղեցնում է ամբիոնի վարիչի պաշտոն: Նույն գրությամբ տրամադրված մեկ այլ տեղեկատվության համաձայն՝ Արմեն Չարչյանը 2022 թվականի մայիսից մինչև նոյեմբեր ամիսն ընկած ժամանակահատվածում **ստացել է աշխատանքային վարձատրություն քաղաքացիաիրավական պայմանագրով «Իզմիրյան բժշկական կենտրոն» ՓԲԸ-ից:**

4. Հարուցված վարույթում քննարկվող հարցերի ուսումնասիրման ընթացքում բացահայտման ենթակա հանգամանքների վերաբերյալ Հանձնաժողովը 2023 թվականի մարտի 17-ին Ե-01/617-2023 գրությամբ պարզաբանումներ է հայցել Արմեն Գերասիմի Չարչյանից, 2023 թվականի ապրիլի 20-ին Ե-01/946-2023 գրությամբ հարցում է կատարել Երևանի Մխիթար Հերացու անվան պետական բժշկական համալսարան, իսկ 2023 թվականի մայիսի 25-ին Ե-01/1236 գրությամբ՝ «Իզմիրյան» բժշկական կենտրոն ՓԲԸ-ին:

5. Վարույթի շրջանակներում Հանձնաժողովի կողմից իրականացվել է գործում քննարկվող հանգամանքների վերաբերյալ ուսումնասիրություն, ինչի արդյունքում պարզ է դարձել, որ «Իզմիրյան» բժշկական կենտրոն ՓԲԸ-ի պաշտոնական կայքում տեղ են գտել հրապարակումներ Արմեն Չարչյանի կողմից վիրահատություններ կատարելու վերաբերյալ: Դրանցից մեկը հրապարակվել է 2023 թվականի մարտի 2-ին՝ «Վիրահատությունը կատարել է պրոֆեսոր Արմեն Չարչյանը» վերնագրով, իսկ մյուս 2

տեսանյութերը հրապարակվել են 2022 թվականի հոկտեմբերի 10-ին և 2022 թվականի հունիսի 8-ին նույնաբովանդակ վերնագրերով:

6. Նշվածի կապակցությամբ Հանձնաժողովի կողմից 2023 թվականի հունիսի 9-ի Ե-01/1341-2023 գրությամբ «Իզմիրյան» բժշկական կենտրոն ՓԲԸ-ին հարցում է ուղարկվել՝ առաջարկելով ներկայացնել Արմեն Չարչյանի կողմից 2021 թվականի օգոստոսի 2-ից մինչև 2023 թվականի հունիսի 8-ը կատարված վիրահատությունների քանակը, ժամանակացույցը, բնույթը և պատմությունները (վիրահատությունների նկարագրերը, այդ թվում՝ Առողջապահության նախարարի 2014 թվականի փետրվարի 14-ի թիվ N 02-Ն հրամանով հաստատված Մեծահասակի հիվանդության պատմագրերը՝ պացիենտի անձնական տվյալները փակված վիճակում):

7. Ի պատասխան նշված գրության՝ 2023 թվականի հունիսի 20-ին Մ-2682-2023 գրությամբ Հանձնաժողով է մուտքագրվել «Իզմիրյան» բժշկական կենտրոն ՓԲԸ-ի N 202/23 գրությունը (այսուհետ՝ նաև Գրություն), որի համաձայն՝ «Իզմիրյան» բժշկական կենտրոն ՓԲԸ-ն հանդիսանում է Բժշկական համալսարանի կլինիկական բազան, իսկ Արմեն Չարչյանը «Իզմիրյան» բժշկական կենտրոն ՓԲԸ-ում իրագործում է Բժշկական համալսարանի 5-րդ կուրսի ուսանողների և 1-3-րդ տարվա կլինիկական օրդինատորների թերոբտիկ և կիրառական ուսուցում, որոնց շրջանակներում նա մասնակցում է որոշ վիրահատությունների՝ որպես վնասվածքաբանության օրթոպեդիայի ամբիոնի վարիչ, և պրակտիկայում բացատրում է և ցույց է տալիս կլինիկական օրդինատորներին և երիտասարդ բժիշկներին, թե ինչպես պետք է կատարել վիրահատության այս կամ այն փուլը:

Գրության համաձայն՝ Արմեն Չարչյանը «Իզմիրյան» բժշկական կենտրոն ՓԲԸ-ում Հանձնաժողովի կողմից նշված ժամանակահատվածում երբեք ամբողջական վիրահատություն չի կատարել և ուսումնական կիրառական գործունեության համար «Իզմիրյան» բժշկական կենտրոն ՓԲԸ-ից որևէ դրամ աշխատավարձ չի ստացել, այլ նրա մասնակցությունը վիրահատություններին որպես վնասվածքաբանության և օրթոպեդիայի ամբիոնի վարիչ, ֆիքսված է պատմագրերում հետևյալ կերպ՝ «Հիվանդը վիրահատվել է պրոֆ. Ա. Գ. Չարչյանի գիտական մանկավարժական ղեկավարությամբ»:

Ըստ գրության՝ պատգամավորի մանդատը ստանձնելուց հետո առ այսօր Արմեն Չարչյանը **որևէ բուժական գործունեություն չի ծավալել** և հետևապես, որևէ

աշխատավարձ չի ստացել: Նրա մասնակցությունը բուժական գործընթացներին եղել է զուտ Բժշկական համալսարանի ամբիոնի վարիչի գործառույթների շրջանակներում և կրել է ուսումնական, մանկավարժական բնույթ, ինչի համար վերջինս ստացել է Բժշկական համալսարանի ամբիոնի վարիչի աշխատավարձ:

8. Գրությանը կից ներկայացվել են նաև Արմեն Չարչյանի և «Իզմիրյան» բժշկական կենտրոն ՓԲԸ-ի միջև կնքված թվով 2 պայմանագրերը՝ ծառայությունների մատուցման մասին, որտեղ պայմանագրի առարկան կազմում է Արմեն Չարչյանի կողմից գիտական աշխատանքի կատարումը:

9. Գրությանը կից ներկայացվել են նաև Առողջապահության նախարարի 2014 թվականի փետրվարի 14-ի թիվ N 02-Ն հրամանով հաստատված Մեծահասակի հիվանդության թվով 71 պատմագրերը՝ պացիենտի անձնական տվյալները փակված վիճակում:

10. Գրությամբ «Իզմիրյան» բժշկական կենտրոն ՓԲԸ-ն հայտնել է, որ Արմեն Չարչյանի մասնակցությամբ համացանցում հրապարակված տեսանյութերի վերնագրերը, որտեղ նշված է եղել որ «Վիրահատությունը կատարել է պրոֆ. Ա. Գ. Չարչյանը», եղել է տեխնիկական վրիպակ «Իզմիրյան» բժշկական կենտրոն ՓԲԸ-ի գործընկեր կազմակերպության կողմից, որոնք լիարժեք չեն տիրապետել իրավիճակին: Նշված վրիպակները ուղղվել են, և ներկայումս տեսանյութերը ձևակերպված են հետևյալ կերպ. «Վիրահատությունը կատարվել է պրոֆեսիոնալ մասնագիտական խմբի կողմից, պրոֆեսոր, «Իզմիրյան» բժշկական կենտրոն ՓԲԸ-ի գիտական համակարգող՝ Արմեն Չարչյանի գիտաուսումնական ղեկավարությամբ»:

Ուսումնասիրելով Գրությամբ ներկայացված մեծահասակի հիվանդության պատմագրերը, պարզվել է, որ նրանցում առկա է «Վիրահատության նկարագրություն» վերտառությամբ բաժին, որտեղ ի թիվս այլ տեղեկությունների, նշված է նաև **«Հիվանդը վիրահատվել է Ա. Գ. Չարչյանի գիտական և մանկավարժական ղեկավարությամբ»** նախադասությունը: Հարկ է նշել, որ այդպիսի բաժին առհասարակ նախատեսված չէ Առողջապահության նախարարի 2014 թվականի 02-Ն հրամանով հաստատված ձևանմուշում, այլ ավելացված է տպագիր տեքստի տարբերակով «Իզմիրյան բժշկական կենտրոն» ՓԲԸ-ի կողմից:

Այս առումով անհրաժեշտ ենք համարում նշել, որ լիազոր մարմնի կողմից հաստատված մեծահասակի հիվանդության պատմագրերը «Բնակչության բժշկական օգնության և սպասարկման մասին» օրենքի 2-րդ հոդվածի և 31-րդ հոդվածի համաձայն՝ հանդիսանում են պարտադիր վարման բժշկական փաստաթղթեր, որոնց լրացումը, վարումը և շրջանառումը ապահովվում է օրենսդրությամբ սահմանված կարգով: Մինչդեռ, սույն գործով Գրությամբ ներկայացված **մեծահասակի հիվանդության պատմագրերը չեն համապատասխանում Առողջապահության նախարարի հրամանով սահմանված ձևաչափին:**

Ուսումնասիրելով Գրությամբ ներկայացված պատմագրերի բովանդակային մասերը՝ պարզվել է, որ 4 պատմագրերի (պատմագրերի հերթական համարներ՝ 3004, 2436, 2237, 2579) «Վիրահատություններ, անզգայազման եղանակներ և հետվիրահատական բարդություններ» բաժնում, որտեղ, ըստ ձևաչափի, նշվում է վիրահատող բժշկի անուն-ազգանունը և ստորագրությունը ուղղիչ գրիչով (շտրիխով) փակվել է վիրահատող բժշկի սկզբնապես նշված անուն-ազգանունը (առերևույթ «Զարչյան» ազգանունը) և ավելացվել է այլ անուն-ազգանուն, ինչից ողջամտորեն ենթադրվում է, որ վիրահատող բժշկի տվյալները փոփոխված տարբերակով են ներկայացվել Հանձնաժողովին:

Այսպիսով, վարույթի շրջանակներում ձեռք բերված՝ վերը թվարկված բժշկական փաստաթղթերի ուսումնասիրմամբ Հանձնաժողովի մոտ ձևավորվել է **ողջամիտ կասկած առ այն**, որ Հանձնաժողովին «Իզմիրյան» բժշկական կենտրոն ՓԲԸ-ի N 202/23 գրությամբ ներկայացված՝ մեծահասակի հիվանդության պատմագրերում ենթադրյալ փոփոխությունները կատարվել են՝ նպատակ ունենալով չեզոքացնել անհամատեղելիության պահանջների հնարավոր խախտումները, որպիսի հանգամանքն էական նշանակություն ունի Հանձնաժողովի համար անհամատեղելիության պահանջների առերևույթ խախտման հիմքով հարուցված վարույթի շրջանակներում վերջնական եզրակացության հանգելու համար:

«Կոռուպցիայի կանխարգելման հանձնաժողովի մասին» օրենքի 31-րդ հոդվածի 5-րդ մասի համաձայն՝ եթե վարույթի ընթացքում Հանձնաժողովը գալիս է այն հետևության, որ կատարված արարքը պարունակում է առերևույթ հանցագործության հատկանիշներ, ապա վարույթի նյութերն անհապաղ, բայց ոչ ուշ, քան եռօրյա ժամկետում ուղարկում է գլխավոր

դատախազություն՝ ընդունելով վարույթը կասեցնելու մասին որոշում: Որոշումն ընդունելուց հետո՝ եռօրյա ժամկետում, որոշման պատճենն ուղարկվում է համապատասխան պաշտոն զբաղեցնող անձին, իսկ եթե վարույթը հարուցվել է դիմումի հիման վրա՝ դիմողին:

Ելնելով վերոգրյալից և ղեկավարվելով «Վարչարարության հիմունքների և վարչական վարույթի մասին» օրենքի 49-րդ հոդվածի 1-ին մասի «ա» կետով և 4-րդ մասով, «Կոռուպցիայի կանխարգելման հանձնաժողովի մասին» օրենքի 22-րդ հոդվածի 2-րդ մասով, 31-րդ հոդվածի 5-րդ մասով՝ Հանձնաժողովը

## ՈՐՈՇԵՑ

1. Ազգային ժողովի պատգամավոր Արմեն Չարչյանի կողմից անհամատեղելիության պահանջների առերևույթ խախտման վերաբերյալ 2023 թվականի մարտի 13-ին հարուցված թիվ 01/2023 վարույթը կասեցնել:

2. ՀՀ գլխավոր դատախազություն ներկայացնել վարույթում առկա նյութերը՝ քրեադատավարական ընթացակարգերի շրջանակում նյութերը գնահատելու, իսկ համապատասխան հիմքերի առկայության դեպքում ընթացք տալու նպատակով:

3. Սույն որոշումը եռօրյա ժամկետում ուղարկել Արմեն Չարչյանին:

## ՀԱՆՁՆԱԺՈՂՈՎԻ ՆԱԽԱԳԱՀԻ

### ՊԱՐՏԱԿԱՆՈՒԹՅՈՒՆՆԵՐԸ ԿԱՏԱՐՈՂ՝

 Recoverable Signature

X 

Մարիամ Գալստյան

Signed by: GALSTYAN MARIAM 5308890730

ՄԱՐԻԱՄ ԳԱԼՍՏՅԱՆ